


TEZAU LITURGIC

19 Iunie

**SLUJBA
SF. IERARH
IOAN
MAXIMOVICI,
ARHIEPISCOPUL
SAN FRANCISCO**



**MINEIUL PE Iunie
MOSCOVA**



МЕСЯЦА ИУНИЯ В 19-Й ДЕНЬ

Святителя Иоанна, архиепископа Шанхайскаго

И Сан-Францискаго

НА ВЕЛИЦЕЙ ВЕЧЕРНИ

Блажен муж: 1-й антифон.

На Господи, возвах: стихиры на 8, глас 6.

Подобен: Всю отложивше:

Воспойм святителя Христова Иоанна, Богом дарованнаго молитвенника нам, иже молитве непрестанной прилежа, служением же литургии и причащением Святейших Таин укрепляемь, исхождаше на делание свое бодренно, поспешая в дома страждущих и в больничныя палаты к недугующим: сего ради освящен и милостив явися, исцелений же и прозрения дара свыше сподоблен бысть. И ныне сый на небеси, со дерзновением молится о спасении душ наших.

Воспойм святителя Христова Иоанна, отроком, отроковицам и младенцем любезна целителя, возрастным советодавца мудра же и

твёрда, ма́терем о ча́дех известителя, крещаемым же и венчаемым благословения пода́теля, провождаемым в жизнь вѣчную моли́твенника вернейша, ревни́теля ле́поты и чи́на службы Бо́жия, па́стыря же и архи́па́стыря, предводя́ща о́вцы своя́ бо́годанныя, к нему́же возопи́ем: о блаже́нне чудотво́рче Ио́анне, моли́ о нас, лю́бовию чту́щих тя!

Восто́к и запа́д, се́вер и мо́ре лику́йте, па́мять пра́зднующе святителя́ чудотво́рца, небеса́ ра́дуйтеся, А́нгела но́ваго прие́млюще, моли́твенника бо́годухнове́ннаго, и па́стыря безсребрени́ка, благода́тнаго целѣбника, проро́ка и благове́стника, Ио́анна, ми́лостиваго на́шего засту́пника, и на суде́ нам кре́пкаго споручника.

И́ны стихи́ры, глас 3:

Преподо́бием и пра́вдою пожив на земли́ и до́бре ста́до Христо́во упас, вѣтхаго челове́ка совлѣкся еси́ и прило́ги вра́жия отразил еси́, неусы́пным бде́нием и зѣльным поще́нием и моли́твою пла́менною ко Го́споду, ю́же и о нас ны́не вознеси́, о́тче Ио́анне.

Ка́ко не дивѝмся неусы́пному трезвѝнию твоему́, и ка́ко не воспоѝм по́стническое житиѝ твоѝ, посреде́ бо ми́ра, во зле лежа́щаго, подвиза́лся еси́, пусты́нником дрѝвним ревну́я. Те́мже и любовь ѝстинную ко Го́споду стяжа́л еси́, е́юже покрѝй нас, чту́щих па́мь твою́.

До́брый служи́телю Христо́ва Ева́нгелия, иже ѝстиною Правосла́вия препоя́сався, пра́щею словѝс твоѝх во́лки тяжкия отгна́л еси́, не испове́дающия Христа́, ѝстинную Прему́дрость Бо́жию, и ину́ю чужду́ю прему́дрость и́щущия. Те́мже и нас умудри́ во спасѝние, блаже́нне и богому́дре Иоа́нне, чту́щия свѝтло всекра́сную па́мь твою́.

Сла́ва, глас 6:

Днесь собра́вшеся, воспоѝм челове́ка Бо́жия, архипа́стыря избра́ннейшаго, свети́льника ру́скаго рассе́яния, учи́теля язы́ков разли́чных, стра́нника в ми́ре сем вре́меннем, насле́дника премирна́го Ца́рствия Небе́снаго, Иоа́нна, святи́теля возлю́бленнаго, и воззовѝм к нему́: моли́ Го́спода при́сно о спасѝнии душ на́ших.

А́ще в пято́к ве́чера: И ны́не, Богоро́дичен
пе́рвый гла́са, а́ще же ни: И ны́не, Богоро́дичен
догма́тик глас 6: Кто Тебе́ не ублажи́т:

Вход. Прокімен дне. И чтéния 3.

При́тчей чтéние:

Па́мять пра́веднаго с похва́лами, и
благослове́ние Госпо́дне на главé его́. Блаже́н
челове́к, иже обре́те премудро́сть: и сме́ртен,
иже уве́де ра́зум. Луч́ше бо сию́ купова́ти,
нежели злата́ и сребра́ сокрови́ща. Честне́йшая
же е́сть ка́мений многоце́нных, все же честное́
недостойно ея́ е́сть. Долгота́ бо дней, и ле́та
живота́ в десни́це ея́: в шу́йце же ея́ бога́тство, и
сла́ва: от уст ея́ исхо́дит пра́вда, зако́н же и
ми́лость на язы́це но́сит. Послу́шайте у́бо мене́, о
ча́да! честна́я бо реку́: и блаже́н челове́к, иже
пути́ моя́ сохрани́т: исхо́ди бо мой, исхо́ди
живота́, и уготовля́ется хоте́ние от Го́спода. Сего́
ра́ди молю́ вас, и предлага́ю мой глас сыно́вом
челове́ческим: я́ко аз премудро́сть устро́их сове́т,
и ра́зум и смы́сл аз призва́х. Мой сове́т и
утвержде́ние, мой ра́зум, моя́ же кре́пость. Аз
мене́ лю́бящия люблю́, ищущи́и же мене́ обря́щут
благода́ть. Разуме́йте у́бо, незло́бивии,

коварство, ненаказанны же, прилагайте сердца. Послушайте мене и паки, честная бо реку, и отверзу от устен правая: яко истине поучится гортань мой, мерзки же предо мною устны лживыя. С правдою вси глаголы уст моих: ничтоже в них стропотно, ниже развращенно. Вся права суть разумевающим, и проста обретающим разум. Научу бо вас истине, да будет о Господе надежда ваша, и исполнитесь Духа.

Притчей чтение:

Уста праведнаго каплют премудрость, язык же неправеднаго погибнет. Устны мужей праведных каплют благодати, уста же нечестивых развращаются. Мерила льстивая мерзость пред Господем: вес же праведный приятен Ему. Идеще аще внидет досаждение, тамо и безчестие: уста же смиренных поучаются премудрости. Совершение правых наставит их, и поползновение отрицающихся упасет их. Не пользуют имения в день ярости, правда же избавит от смерти. Умер праведный, остави раскаяние: наручна же бывает и посмеятельна нечестивых пагуба. Правда непорочнаго

исправляет пути, в нечестие же падает неправда. Правда мужей правых избавит их: безсоветием же пленяются беззаконнии. Скончавшуся мужу праведну, не погибнет надежда: похвала же нечестивых погибнет. Праведник от лова убежит, вместо же его предаётся нечестивый. Во устех нечестивых сеть гражданином, чувство же праведных благоспешное. Во благих праведных исправится град, и в погибели нечестивых радование. Во благословении правых возвысится град, усты же нечестивых раскопается. Ругается гражданином лишенный разума, муж же мудрый безмолвие водит.

Премудрости Соломоновы чтение:

Праведник, аще постигнет скончаться, в покой будет. Старость бо честна не многолетна, ниже в числе лет исчитается: седина же есть мудрость человеком, и возраст старости житие нескверное. Благоугоден Богу быв, возлюблен бысть, и живый посреде грешник, преставлен бысть. Восхищен бысть, да не злоба изменит разума его, или лесь прельстит душу его. Рачение бо злобы помрачает добрая, и парение

пóхоти пременяет ум незлóбив. Скончáвся вма́ле, испóлни лéта дóлга: уго́дна бо бе Го́сподеви душá его́: сего́ ра́ди потщáся от среды́ лука́вствия. Лю́дие же ви́девшие и не разумéвшие, ни́же по́ложше в помышлénии таковóе: я́ко благодáть и мило́сть в преподо́бных его́, и посещéние во избрáнных его́.

На литии стихира храма, и стихиры святителю,
глас 6:

О́трок сый ещё́ млад, умили́лся еси́ словесéм Христóвым, и́миже воззва́ Господь́ святы́я апóстолы пёрвыя, си́це рек: по Мне грядита́, и сотворю́ вы ловца́ челове́ком. Внима́я же сим Божéственным глаго́лом, о смиренномóудре Иоáнне, ты ника́коже помы́слил еси́ себе́ бы́ти жрёбием подобна́ Бо́жиим послáнником послéдним и насмёртником. Сам Христóс тя вéдый, тя просла́ви. Буди́ же нам увенчáние твоё́ к покая́нию нелицемёрному́ воззвáние, во спасéние душ на́ших.

Глас 1:

Безплóтным си́лам, непреста́нно Бо́га хва́лящим, досто́йно поревновáл еси́ приснобдénный Иоáнне преподо́бне, любóвию

огненною твоєю, сего ради тех ликостоянием
сопричтался еси.

Апостола благодатнаго времён
безблагодатных, юродивым подражателя
премудраго, и постников великонравнаго
единоревнителя, тя, отче Иоанне, велий
чудотворче, восхваляем.

Слава, глас тойже:

Дивному во святых Своих, Богу и Владыце,
пение и исповедание приносиши непрестанно, в
трех Лицах познаваемому, в существе же
едином проповедаему, храм Свой в души твоей
воздвигшему, и светом Своим присносущным
осиявшему тя, тобою же и нас просвещающему.

И ныне, Богородичен, глас тойже:

Радуйся, Пречистая Дево, радуйся,
Богоневесто, радуйся, верных прибежище,
радуйся, святителей непрестанное пение,
радуйся, храмы Твоя воздвигнути даровавшая
угоднику Твоему, блаженному Иоанну, егоже
моления приемши, спаси благочестно поющая
Тя.

На стиховне стихирѣ, глас 1.

Подобен: Небесных чинов:

Бодрствуя и моляся во дни и в нощи, побеждал еси вся искушения вражия, Иоанне святителю терпеливейший, от младенства служити правде Божией восхотевый, к Небесному же Царствию выну устремлен, сущих zde на земли утешая, миловал еси.

Глас 6:

Стих: Во всю землю изыде вещание их и в концы вселенныя глаголы их.

Наслаждение тленное всеконечно отринув, Господу твоему последовал еси, и пастырский жезл, яко тяжкий крест восприим, овцы твоя управил еси, пред ними ходя и глашая по имени, и мы глас твой добре вѣдуще, вслед тебе ходити тщимся, ты же в радость Господа твоего возшед, неотлучен от нас пребуди.

Стих: Небеса поведают славу Божию, творение же руку Его возвещает твердь.

Наставник воистину всемирный, благочестия учитель и Духа Святаго сосуд избранный показался еси, блаженне Иоанне, темже вси

концы́ ты просла́вляю, от восто́к со́лнца да́же до за́пад, в храм твой притека́юще к мо́щам твои́м, исцелéния и по́мощь в скóрбех приéмлют, ты бо в ра́дость Го́спода твоего́ возше́д, неотлу́чно от нас пребыва́еши.

Сла́ва, глас б:

Образ вои́стину был еси́ ве́рным, сло́вом, жити́ем, любóвию, ду́хом, ве́рою и чистото́ю: те́мже во всю зéмлю изы́де веща́ние исправле́ний твои́х, и на небеси́ обрёл еси́ мзду трудо́в твои́х, но и земны́х не разлучи́лся еси́, я́ко исто́чник благода́ти приснотеку́щий, мо́щи твоя́ нам оста́вил еси́, и ны́не мо́лишися во е́же до́брый плод духо́вный принести́ нам, и́же даро́в твои́х насладивши́мся.

И ны́не, Богоро́дичен, глас то́йже:

Творе́ц и Изба́витель мой, Пречи́стая, Христос Го́сподь из Твои́х ложе́сн проше́д, в мя оболкнись, пе́рвыя кля́твы Ада́ма свободи́. Те́мже Ти, Всечи́стая, я́ко Бо́жии Ма́тери же и Де́ве, вои́стину вопи́ем немóлчно: ра́дуйся а́нгельски, ра́дуйся, Влады́чице, предста́тельство и покрóве, и спасéние душ на́ших.

Тропа́рь, глас 5:

Попече́ние твоё о па́стве в страна́стии ея́, се проо́браз и моли́тв твои́х, за мир весь при́сно возно́симых: та́ко ве́руем, позна́вше любо́вь твою́, святи́телю и чудотво́рче Иоа́нне. Весь от Бо́га освяще́н священноде́йствием Пречи́стых Та́ин, и́миже при́сно укрепля́емь, поспеши́л еси́ ко стра́ждущим, целите́лю отра́днейший: поспеши́ и ны́не в по́мощь нам, всем се́рдцем чту́щим тя.

Ин тропа́рь, глас 1:

Святи́тельства дар преумно́жил еси́, сло́ва пропове́данием апо́столом поревнова́в, бде́нием же, постом и моли́твою с преподо́бными вмени́лся еси́, клевету́ и поноше́ния с крото́стию прие́мля. Сего́ ра́ди Христо́с тя просла́ви чудесы́, и́хже оби́льно излива́еши на всех с ве́рою притека́ющих к тебе́: и ны́не спасай нас моли́твами твои́ми, Иоа́нне досточу́дне, святи́телю Христо́в.

НА УТРЕНИ

На Бог Господь: тропарь, глас 5: Попечение твое о пастве: Дважды. Аще суббота: Слава, и ныне, Богородичен первый гласа. Аще же ни:

Слава, и ныне, Богородичен, глас тойже:

Радуйся, двере Господня непроходимая: радуйся, стено и покрове притекающих к Тебе. Радуйся, необуреваемое пристанище, и неискусобрачная, рождающая плоть Творца Твоего и Бога: молящи не оскудевай о воспевающих, и кланяющихся рождеству Твоему.

По 1-м стихословии седален, глас 6:

Божия слова служителю верный, и Духа Святаго сосуде избранный, ты на камени заповедей Христовых дом души твоея утвердил еси, и воздвигшимся ветром искушений, не падеса внутренняя храмина твоя, сего ради и власть тебе дадеса чувственному вихрю и трусу запретити: огради и нас ныне от волн моря житейского, и в пристанище тихое управи.

Слава, и ныне, Богородичен, глас тойже:

Изнемогаёт сло́во, е́же пѣти, Влады́чице, вели́чия Твоя́ и сла́вити чудеса́ Твоя́ во вся́ком ро́де и ро́де, те́мже кра́ткими глаго́лы и мно́гим упова́нием архангелски вопи́ем Ти: ра́дуйся, Благода́тная.

По 2-м стихосло́вии, седа́лен, глас 5:

Ве́рою и любóвию па́мять твою́, небесный челове́че и а́нгеле земный, вси почита́ем днесь: в ми́ре бо многомяте́жнем пусты́нник и́стинен был еси́, и стра́сти вся умертви́в, на высоту́ духо́вную неудобозри́мую дости́гл еси́, вои́стину чу́до светле́йшее во мра́це ве́ка сего́ был еси́: сего́ ра́ди диви́мся вели́цей сла́ве твое́й я́же на небеси́, и умиле́нно торжеству́ем прославлéние твое́.

Сла́ва, и ны́не, Богоро́дичен, глас то́йже:

Отчая́ Божество́нная Премудро́сть и Сло́во пре́жде век су́щее, Божество́нная сла́вы неотлу́чное, от Тебе́ же, Богома́ти, нищету́ на́шу восприе́млет и в ра́бий о́браз нетле́нно вообража́ется, да к пѣрвей сла́ве и лу́чшему блаже́нству возведёт дре́вле па́дшия: те́мже Тя, Влады́чице, я́ко Тобо́ю изба́вленнии, немóлно ублажа́ем.

Величание:

Велича́ем тя, святи́телю о́тче Иоа́нне, и чтим святу́ю па́мять твою́, ты бо мо́лиши за нас Христа́ Бо́га на́шего.

Псалом избранный: Услы́шите сия́, вси язы́цы, внушите́, вси живу́щии по вселенней.

По полиелеи седа́лен, глас 4:

Сла́вы дре́вних святы́х преизрядный ревни́телю, восто́ку неведомых и запа́дом небреже́нных, тех стопа́м послédовал еси́, и к предста́тельству их прибега́я, единовсельник тех по сме́рти яви́лся еси́, мы же к твоему́ заступле́нию прибега́ем ны́не: не презри убо́гих, о́тче Иоа́нне, но в свято́е сие́ собра́ние введи́ нас, я́ко единонадеся́таго часа́ де́лателей, да взы́дем на ме́сто послéднее, среди́ перворо́дных Це́ркве, торжеству́юще.

Сла́ва, и ны́не, Богоро́дичен, глас то́йже:

Соше́дшися днесь, соверша́ем торжество́ дивнаго святи́теля Иоа́нна, и́же воздви́же Тебе́ храм, Влады́чице, я́ко всем скорбя́щим ра́дость и немощны́м по́мощь и исцеле́ние Ты еси́, и к Тебе́ припада́ем, споручника сего́ иму́ще: помози́ нам в не́мощех недугующим и грехи́ мно́гими

отягощённым, да Твоими молитвами милость
обрящем вскоре у Сына Твоего и Бога нашего.

Степенна, антифон 4-го гласа. Прокимен,
глас 4: Честна пред Господом смерть
преподобных Его. Стих: Что воздам Господеви о
всех, яже воздаде ми. Всякое дыхание:
Евангелие от Иоанна, зачало 35, от полу.

По 50-м псалме стихира, глас 6:

Радуются днесь православных собори, и
ликующе светло, величают светильника новаго,
древним святителем равносительна, на конец
веков возсиявшаго миру и земныя вся концы
просветившаго, Иоанна пречуднаго,
преподобным спостника и святителем
собеседника, исповедником равнаго крепостию
и безмездным целителем венец и украшение,
присно молящаяся о душах наших.

Канон молебный Пресвятыя Богородицы, глас 8:

Воду прошед:

И канон святителя, глас 4:

Песнь 1

Ирмос: Моря чермную пучину невлажными
стопами древний пешествовав Израиль,

крестообразными Моисеевыми руками,
Амаликову силу в пустыни победил есть.

Благо есть воспевати угодники Божия, в ихже
лице нам радостне светит святыи Иоанн,
утешая, врачуя его призывающия, и научая нас
образом многотруднаго жития своего ревновати
о помощи сущим в бедах.

О желание сердца боголюбиваго! Возжелал
еси еще в возрасте детищном истины быти
поборник. Тако бо пленisha ты повести о
непощадивших жизни своя за правду Божию
дивных святыих.

Привременно недоуменен был еси, еже
каковый путь, воинский или гражданский, себе
избрати. Но зреша в души твоей крепчайша
мысль: всего себе предати на служение святей
Церкви Христовой.

Богородичен: О Тебе хвалимся, Богородице, и
к Богу Ты имамы непостыдное предстательство,
прости руку Твою необоримую и сокруши
враги наша, низпосли Твоим рабom помощь от
Святаго.

Песнь 3

Ирмос: Веселится о Тебе Церковь Твоя, Христе, зовущи: Ты моя крепость, Господи, и прибежище и утверждение.

С веселием совершаем память твою, архипастырю наш и наставниче, покланяемся честным и нетленным мощем твоим, просяще молитв твоих.

Восприял еси образ ангельский, и обокся во вся орудия Божия, ополчился еси противу духов злобы поднебесных, побеждая их.

Не дал еси сна довольна очесем твоим, не возлегал еси на одр во еже почити, уподобився отцем древним, о подвижниче.

Богородичен: Рай жизни сущи, Богородице, смерти греховныя и страстей многообразных избави мя вскоре.

Седален, глас 4:

Молитва твоя, отче Иоанне, аки столп огненный до небес досягаяй явися, путеводящ Израиля новаго в житейстем странствии, сего ради чтущим тя терпение даруй и благодарение Господу в сердцах насади, да не якоже ропотницы оныя, египетских мяс рачителие,

осудимся, но да сподобимся земли обетованных нетленных благ насладиться.

Слава, и ныне, Богородичен, глас тойже:

Утверждение нам еси, Богомати, и священное прибежище влающимся прилоги вражими, Тобою же покрываемы, прощение грехов и дерзновение ко Господу обретаем.

Песнь 4

Ирмос: Вознесена Ты видевши Церковь на Кресте, Солнце Праведное, ста в чине своем, достойно зываючи: слава силе Твоей, Господи.

Множества архипастырей наставник, Церкви Русския небесный предстатель, сам сый ревнитель монашескаго жития, ты, святе Иоанне, чудо наших дней именованом и в подвизах крепкостоятельна.

Аще хощете, людие, святаго жива видети, во град Битоль поспешайте, зрите тамо отца Иоанна! Тако сербский именитый архипастырь изрече, нраву же и делом Иоанновым дивящийся.

Юноши карпаторуссии, сербскаго училища питомцы, о тебе с великим умилением повествоваху, о твоём к себе непопадении и к

ним любве, еже како осенял еси их крестным знаменем, ходя между спящими, покой их соблюдая.

Богородичен: Пречистая Мати Господа нашего и Дево, милующая и грешнейших рабов Своих, яко милосердия сокровищница пребогатая, обнови нас, безмерно обнищавших, всех скорбящих Заступнице и Радосте.

Песнь 5

Ирмос: Ты, Господи мой, Свет в мир пришел еси, Свет Святей, обращающий из мрачна неведения, верою воспевающая Тя.

Подражатель истинный Христов был еси, святителю, темже душу полагая за паству твою, предстал еси Пастыреначальнику непостыдно.

Исцелений дар дадеся ти еще во пресвитерстве, егоже преумножил еси во дни святительства, и ныне усовершаеши в ином и вечном житии.

Преподобному Науму был еси содейственник во исцелениях, со иконою его святою посещая дома страждущих.

Богорóдичен: Богорóдице Дéво, вселénная
благáя Помóщнице, Целительнице душ и телес
наших, услыши нас и в день сей молящихся
Тебé.

Песнь 6

Ирмос: Возопи́ прообразу́я погребéние
триднёвное проро́к Ио́на, в ките моля́ся: от тли
избáви мя, Иису́се Царю́ сил.

Приидите, восхва́лим Богорóдице храм
воздвигшаго, само́го же всем скорбя́щим
ра́дость и храм Ду́ха Свята́го бывшаго.

Поспешáл еси́ и в до́мы страждущих, и в
пала́ты больничныя к недугующим, о нихже
откры́ ти Госпо́дь, я́ко Пречистых Таин Его́
препода́телю.

Боля́щим младенцем яви́лся еси́ здра́вля
ходата́й, святы́й Иоáнне, скорбь родительских
душ пременя́я на ра́дость, и всем возра́стом ты
показа́лся еси́ вожде́ленный помóщник.

Богорóдичен: Отéчества правосла́вного
лиши́хомся, Влады́чице, внегда́ во́лны гнéва
Госпо́дня над ним проидо́ша, занé хранителие
су́етных и ло́жных содея́хомся, внегда́ же
скончава́тися душа́м на́шим, Го́спода

помяну́хом, да приидет к Немú Тобо́ю на́ша моли́тва и пе́ние.

Конда́к, глас 4:

Христу́ Пастыренача́льнику послéдовав, во святи́телех изряднейший яви́лся еси́, спасл бо еси́ о́вцы своя́ от губи́тельства безбо́жных, пристáнище ми́рное тем учредив, и попече́ние непреста́нное о па́стве имéя, врачевáл еси́ их недúги душе́вныя же и телéсныя, и ны́не о нас к твоимъ́ честнымъ́ мощémъ́ припада́ющих, моли́ Христа́ Бо́га, óтче Иоáнне, в ми́ре спасти́ся душа́м на́шим.

И́кос:

Небеса́ ны́не с на́ми раду́ются, и лица́ святи́х приéмлют но́вое и пресла́вное украше́ние: апóстоли проповéдника всеми́рнаго целу́ют, мученицы́ дрéвнии восхваля́ют дивно́ просла́вльшаго па́мять их, святи́телие собесéдуют ра́вному в словеси́ и премúдрости, бде́нному же подви́жнику преподо́бнии дивя́тся, ца́рие святи́и моли́твенника о возо́становле́нии ца́рства правосла́внаго почита́ют, безсре́бреницы с целите́лем безме́здным мзду нетле́нную и неде́лимую разделя́ют: ели́ко

всеславно бысть служение твоё, отче Иоанне, тако и венцев тебе исплетётся множество. Но молися купно с лики святых ко Христу Богу о нас, к честным мощем твоим припадающих, в мире спастися душам нашим.

Песнь 7

Ирмос: В пещи Авраамстии отроцы персидстей, любовью благочестия паче, нежели пламенем опаляеми, взываху: благословен еси в храме славы Твоея, Господи.

Сына света и дне благодать воистину ты содела: на всяк бо день Святыми Тайнами укрепляемь и обожаемь, утвердил еси в Господе сердце твоё.

Милостивым предстательством твоим верныя и неверныя спасахуся и дары благодатныя приимаху, ты же, даруя независтно исцеления, во тьме прелести не оставляеши пребывати заблуждшия, но единого Царя Славы учиши православно воспевати во вся веки.

Помощь и утешение изгнанным людем Своим дивно сотвори Господь, даровав нам тя заступника, святителю Иоанне, но и ныне

покрый нас от враг наших невидимых и из руки всех, ненавидящих нас.

Богородичен: Отцы наши согрешиша и предани быша в руки врагов беззаконных и лукавнейших паче всея земли, что убо сотворим, Владычице, согрешения родительская непрестанно умножающе, и како козней лютых избежем, аще не Ты заступиши кающихся и спасения требующия?

Песнь 8

Ирмос: Руце распростёр Даниил, львов зияния в рове затчѣ, огненную же силу угасиша, добродетелию препоясавшеса, благочестия рачители отроцы, взывающе: благословите, вся дела Господня, Господа.

Сердце твоѣ распространися ко всем любвию молящим ти ся, Иоанне святителю, поминающим подвиг всего многотруднаго жития твоего, безболезненное же и лёгкое преставление твоѣ, Одигитрии Пречистыя верный служителю.

Ничтоже возможе препяти ти, посещающе в больнице чад твоих, пастырю добрый, ни дождь, ни буря, ни тьма нощная, иногда никомуже

зову́щу, ду́хом предвѣдя нѹжду их, Го́споду поспѣшствующу и указу́ющу, да вси просла́вят Бо́га оте́ц на́ших.

Егда́ ца́рства правосла́вная на земли падо́ша и забвѣнию пре́дана бы́ша, не преста́л еси́ победы проси́ти царѣм благове́рным в дре́вних пѣснях неизме́нно, я́ко тех держа́ва благослове́нна есть от Бо́га оте́ц на́ших.

Богоро́дичен: Вели́чит ду́ша Твоя́, Влады́чице, Го́спода на́шего и радуется дух Твой о Бо́зе Спа́се и Сы́не Твоѣм. И ка́ко сме́ли бы́хом мы воспева́ти пѣснь Твою́, а́ще не бы благоволи́ла Сама́ проро́чески рещи́, я́ко ублажа́т Мя вси ро́ди.

Песнь 9

Ирмо́с: Ка́мень неруко́сѣчный от несекóмья горы́, Тебе́, Де́во, краеуго́льный отсече́ся, Хри́сто́с, совокупивый разстоя́щаяся естества́. Тем веселя́щися, Тя, Богоро́дице, велича́ем.

Поспеша́я ко стра́ждущим, прѣсно ду́шу твою́ за о́вцы твоя́ полага́л еси́, те́мже и чудотворе́ний дар тебе́ даде́ся, моли́твами бо твои́ми немощствую́щии препоя́сашася си́лою, и ни́щии

добродѣтелию от гнѡища страстѣй
воздвигѡшася.

Зарѣю свѣтлою людем па́ствы твоея́ просия́л
еси́, ѡ́тче Иоа́нне, ввсегда́ смутитися душамъ ихъ в
годину Бо́жия гнѣва, но помяну́л естъ Госпо́дь
ми́лость Свою́ и смире́нныя уте́ши тобо́ю.

К Ца́рству Бо́жию пути́ наша́ напра́ви,
послуживы́й ему́ преподо́биемъ и пра́вдою вся
дни живота́ твоего́, наста́ви ра́зумъ людей твои́хъ
ко спасѣ́нию и просвети́ во тьме и сѣни
смѣртней сидя́щия, ѡ́тче блаже́нне Иоа́нне, да
ра́достно пою́ще, соверша́емъ па́мять твою́.

Богоро́дичен: Наста́ви но́ги наша́ на путь
ми́рен, Всечы́стая Влады́чице, Миръ И́стинный к
челове́комъ приве́дшая, Сы́на Твоего́, Кресто́мъ
вражду́ упразднѣ́вшаго и дре́вняго супоста́та
побѣ́дно низложившаго.

Свети́лен:

А́ще и умро́х, но живъ есмь, не скорбите,
лю́дие: си́це по преставлѣ́нии твоѣ́мъ возвестилъ
еси́, свѣ́томъ та́инственнымъ просвещая́ тя
пою́щия, ѡ́тче Иоа́нне, святителю́ предивный.

Сла́ва, и ны́не, Богоро́дичен:

О Тебе́, Богоро́дице Де́во, свя́тии вси пра́зднующе ра́дуются, и на Тя упова́ем мы, раби́ Твои́ многогрéшнии, зову́ще: весели́ся и ра́дуйся, Ма́ти Христа́ Вседержи́теля.

На хвали́тех стихи́ры, на 4, глас 4:

Благода́рно воспои́м, ве́рнии, Го́споду Бо́гу на́шему, и восхва́лим Его́ по мно́жеству вели́чества Его́, дарова́вшего нам засту́пника изря́днаго, на земли́ чудотвори́вшего, и с небесе́ на убо́гия призира́ющего, ему́же ны́не прино́сим пе́ние и к моще́м его́ припа́даем со стра́хом, изба́вления прегреше́ний прося́ще и душа́м на́шим спасе́ния.

До́браго па́стыря и детопита́теля восхва́лим, сей бо тща́ние о па́стве име́я, наипа́че о де́тех сирота́х име́яше попече́ние и оби́тель им сотвори́, свя́тителя Тихона́ Задонска́го в по́мощь призва́в, и не оста́ви их в беде́, су́щей бра́ни от безбо́жных, но да́же до кра́я вселе́нныя в ти́хое приста́нище пресе́ли, его́же моли́твами и нам, Спа́се, сотвори́ ми́лость.

Бде́нное пе́ние соверша́юще, ве́рнии, восхва́лим Го́спода Бо́га на́шего и Его́ до́браго

служителя, егѡже избра́, я́ко не от ми́ра бысть: сей бо о́браз показа́ нам терпѣния и моли́твы непреста́нныя, Бо́жию же му́дростию просвещѣн, правыя вѣры ревнитель бысть, вѣрныя всяко наставляя. Тѣмже моли́твами егѡ́, Христе́ Бо́же, пода́ждь нам в правой вѣре и благоче́стии пребы́ти.

Дивнаго Бо́га во святы́х Свои́х, всякое дыха́ние псаломски да восхва́лит, на ко́нѣц веко́в низпосла́вшаго нам чу́дное утешѣние, Иоа́нна, святите́ля всеми́рнаго, и́стины побѡрника крѣпкаго, посреде́ собла́знов и лжи недви́жно пребы́вшаго, и от мра́чныя прѣлести вся водвиза́ющаго и ко спасѣ́нию нас приводя́щаго.

Сла́ва, глас то́йже:

Испове́дуем дивное заступлѣние твоѡ́, не таи́м чудѣс твои́х, на нас бы́вших, ходатаю́ наш ко Го́споду, святите́лю Иоа́нне, и́миже упова́нию правосла́вному науча́еши нас, маловер́ных, и уныва́ющих и ропотли́вых, да твои́ми моли́твами по́мощь Бо́жию и́мамы, е́юже спаса́емся от ро́да сего́ развра́щеннаго, чту́щии досто́йно па́мять твою́.

И ны́не, Богоро́дичен, глас то́йже:
Богоро́дице, всех Цари́це, правосла́вных
похва́ло, ерети́чествующих шата́ния разори́, и
ли́ца их посрами́, не кла́няющихся, ни́же
чту́щих, Пречи́стая, честный Твой о́браз.

Славосло́вие вели́кое. Тропа́рь, и отпу́ст.

НА ЛИТУРГИИ

Блаже́нна от канона́ святите́ля, песнь 3-я и 6-я.

Проки́мен, глас 1: Уста́ моя́ возглаго́лют
прему́дрость, и поуче́ние се́рдца моего́ разу́м.

Стих: Услы́шите сия́, вси язы́цы, внушите́,
вси живу́щие по вселе́нней.

Апо́стол ко Евре́ом, зача́ло 318.

Аллилу́ия, глас 2: Уста́ пра́веднаго поуча́тся
прему́дрости, и язы́к его́ возглаго́лет суд.

Ева́нгелие от Иоа́нна, зача́ло 36.

Прича́стен: В па́мь вѣ́чную бу́дет
пра́ведник, от слуха́ зла не убой́тся.

**Утверждена Священным Синодом
Русской Православной Церкви
16.07.2013 (журнал № 82).**